

摛藻堂四庫全書薈要

集部

欽定四庫全書叢要

集部

樂城集卷三十
三十一

詳校官助教臣常衡



欽定四庫全書叢要卷一萬五千二十五

集部

欒城集卷三十

宋
蘓轍
撰

西掖告詞五十九首

姚勔宗正丞

勅具官某進取之士志於功名不得廉退靖重之人以
鎮之則往而不返流以成俗朕方博求賢雋以助成治
道聞爾淡於榮利未老而歸宴居丘園稱道不亂是以
擢丞宗正以風勵天下勉從弓旌之命使士大夫知篤

行之貴可

林希湖州周之純宣州沈季長秀州

勅具官某等江浙之間山川民物之勝有唐臺省之士求守其地有不可得者矣今茲士大夫重內而輕外胙之千里之社或缺然不滿其意此豈朕不泄邇不忘遠之意哉以爾希蚤與從官文學足用之純昔嘗奉使才幹有聞季長久於滯淹風力不替朕惟吳郡宣城嘉禾三郡之富思得才者付之吏民勉究乃心毋以內外為

高下之意民苟安汝朕不汝遺可

李傑梓州提刑陳鵬運判

勑具官某等東蜀諸郡頃以西南夷之亂輸輓供億民不堪命朕既寬而養之疲瘵未復而春夏繼旱有艱食之憂是以刺舉之吏其選尤急以爾傑頃參使事久勞於職習知其故以爾鵬生於其鄉長為之吏詳其得失故使傑察其刑鵬佐其漕朕於遠人所以念之者至矣推予此心各勉於治可

呂陶京西運副上官均比部貟外郎

勅具官某等士任言責則無官守以言取人而不試以事朕以為未也昔漢宣帝以諫大夫通政事者補郡國守相而唐世御史與尚書郎相出入也蓋前世之所以用人者至矣今陶由殿中擢與七人之列而均以監察遷為副端之重其為朕明是非辨邪正者多矣其以陶刺舉許洛諸郡而以均校計出納諸籍苟試之以事而人無間言焉則才可見矣可

史宗範知涇州

勅具官某安定雖非極邊而聚糧訓兵為疆場之重所
賴者多矣爾歷試諸郡治辦之聲達於朝廷是以召之
江淮優佚之邦付之金革備禦之地勉修厥政綏懷兵
民而撫循將佐以稱予選任之意可

黃慶基鴻臚丞

勅具官某鴻臚之於諸寺號為少事矣然皆朝廷所以
長育人材之地未嘗妄授也爾通守南邦蓋未嘗求而

選擢自至其克自奮勵使天下信吾用人之公非苟然而已也可

張峋戶部貟外郎錢長卿刑部貟外郎

勑具官某等六卿之屬其切於民事者地官制其衣食而秋官治其生死有非其人或受其病以爾峋將漕右輔民不告勞長卿司計中臺事不失統是用以時進之俾佐二部夫職日以高則責日以重惟能以遷為憂而不以為喜則職事舉矣可

大名府驍武第一指揮都虞候楊政等七人可並

左右侍禁

勅具官某等承平既久貔虎之士以歲月為勞坐致好
爵既登仕籍復從吏治惟廉與慎可以安受寵祿可

韓維守本官資政殿學士知鄧州

勅朕承祖宗之不業訪求黎老與共國事別復裕陵藩
邸之舊父兄世臣之餘民望所依朕何敢後然而華髮
在御有賢勞之嗟旅力既愆以出守為樂進退之際禮

義存焉具官某頃以耆艾恬於燕閒召寘邇英賴其勸
講之助擢居黃闈付以議論之權任寄方深歲月未幾
惟廊廟有日昃之務而方州存臥治之風眷南陽之大
邦本故鄉之近地仍還舊職以示往恩尚俾中外之臣
知予終始之意思永終譽克綏厥心可

李士京將作丞余中軍器丞

勑具官某等匠事之不可廢與戎備之不可忘其職均
耳以親為嫌法所當避往祇新命率職無怠可

劉務誠三班奉職

勅具官某爾自宣猷改隸奉常歲月滋久勤亦至矣錫
爾好爵勉於廉節以安寵祿可

王袞知兗州

勅具官某吏道以律令為師然讀其書誦其數而不知
所以行之未足與言治也爾明習三尺出守列郡臨長
吏民知弛張之方有循良之譽急於親養來請鄉邦朕
不爾違以勸能吏祇服休命益勉無怠可

馮宗道遙郡刺史

勅朕嚴內外之分飭左右之戒是以近習之臣雖才智
敏強見於內廷而外無知者具官某蚤蒙器使薦經事
任出入諸道靖而不煩比緣積勞之久擢參後省之秘
而重慎祗肅有加於前宜因寄資之崇益以閱月之效
佩之郡印以寵貂冠勵爾在公清我禁闈可

胡田先以宮苑副使知誠州改為軍除為知軍

勅某沅誠皆南邊新郡而誠之於沅地不能半官更兵

丁餽餉勞止比因有司之請易以軍壘之稱爾因領舊治以撫遠民均為長吏毋以名號之殊為輕重之意可

陳安石知襄州

勅襄陽古都會也山河雄勝居楚越之上游風俗剽悍無雍洛之餘習在戰國為用武之地方承平為無事之國牧守之勝圖牒具在具官某起自世族華髮一心試之中外清節可紀比者解印西上持節南陽坐席未溫捧詔入觀眷荊州之重地方守臣之闕人匪為爾私將

適民望勉圖安靜之術思繼循良之風可

孫懷用知寧化軍郝逢知岢嵐軍

勅具官某等嵐谷固軍皆樓煩之故地民事雖簡而邊政為重守土之吏必慎所付爾等咸以選任習於疆場之政惟恩與信可以附吾民而服隣國勉思訓言毋怠於事可

王愈光祿寺丞

勅某政無大小以得人為重雖復膳羞之末足效才否

之實爾久試於外而來居此勉修厥職毋忝朕命可

姚勔秘書丞

勑具官某爾以清節懿行聞於鄉黨公卿譽者交至於前乃者擢丞宗正實刊玉牒顧惟東觀之重號為衆材之委往服厥職益懋乃德以稱予待爾之意可

蒲宗閔知興元府史宗範知廬州

勑具官某等漢中蜀之大都而合肥楚之奧壤守臣之選不在有司以爾宗閔入治郎曹出將使指以爾宗範

踐歷藩屏宜于吏民因其已試之效付以共理之柄往
祇厥服俾二郡之民被愷悌之政以助予治可

林顏權知泉州

勑某祿廩之給官有常日爾奉使於外而取逾於法以
致人言將何以率勵群吏責之廉節乎宜罷所領假守
方州祇服寬憲修省無怠可

孔平仲太常博士

勅具官某刑政之得失衆人知之然其所興壞止於其

事而已禮樂之得失視之未必見也而治忽之端或自是起故朕於奉常之官擇之必慎用之亦速爾以儒術精博吏治通敏以在茲選其克為朕別嫌明微以詔爾長俾上下内外不愆于舊章則爾職舉矣可

西蕃首領溫溪心心牟欽擅二人並除化外州團

練

勅具官某等天之於人善惡必報朕上法天道以爵命四方有能忠勤必保富貴爾等才雄諸部心奉本朝審

於禍福之原明於逆順之理團兵寵秩蓋旌守節之堅
絕等異恩當俟成功之報可

鄭佾知單州

勑某公卿之世有列於朝不患不用而患不立爾名臣
之後以詞藝自奮入佐卿寺出典藩服由河內領單父
恩亦厚矣毋忝乃祖勉思所以報者可

孫之敏知雍丘楊瓌寶知咸平

勑某等畿邑大夫古所謂內諸侯也仰有朝廷俯有吏

民善惡之效朝夕可見以爾之敏家世名臣才穎自著
以爾瓊寶宦學歷歲志節不回試以鄉遂之民將觀政
事之實在邦必達爾尚勉之可

許懋右司郎中

勅某萬幾出納萃於中臺詔敷稽停文案壅滯自唐貞
觀之盛而患之矣矧今俗弊政煩實倍前世雖上有管
轄而郎不得人罔與共濟以爾奮自周行亟更劇務強
敏樂易所至有成是以召自南服還領右部尚能體予

不次之舉勉盡匪躬之節虛位以俟爾其欽哉可

陳軒主客郎中

勅某春官之屬皆郎之清選也爾昔以文藝發身名在
甲乙中以請退補外安於遐逖還朝已久素守不逾今
典祠溢員而司藩虛位祇服朕命往勤厥官可

豐稷殿中侍御史

勅具官某孔子稱有德者必有言德之無素而言以為
責則言有失當而聽者惑矣爾昔為御史不得其言而

去出使諸道入居郎曹端良之聲予有聞焉其尚一乃
心時有德言來告俾予一人獲聽德之助可

陳知晦蔡州簽判

勅具官某五世舊臣百年遺老求之於時蓋無幾矣今
其子弟官於四方左右莫與為養大臣來告惻焉疚懷
以爾篤於孝弟服勤無斁雖從事汝南疑於左遷而朝
夕之奉實惟汝志可

向宗旦司農少卿

勅具官某司農掌倉庾委積舟楫苑囿之政令以時行
視吏卒因其勤惰而正其黜陟蓋亦勞矣異時二卿共
事猶或不給今萃于一安得不告勞乎爾以世家之盛
猶外戚之寵而任由科舉官有風迹往為之少俾羣司
競勸衆務咸舉以稱朕命可

侯利建京東漕井亮采河東漕

勅具官某等齊魯之富甲于四方而連歲水旱民艱於
食盜賊將起汾晉之貧甚于西邊而逮秋豐成粒米狼

戾收斂為急朕思得良使者以濟二方之宜以爾利建
忠節強勁安靖不擾以爾亮采才力敏濟察舉有方卓
然已試之效庶幾諸道之選往祇厥服使民食無匱而
邊儲有繼此予所以命汝意也可

馬城湖北憲

勑某爾轉漕汾晉之間以羨補不足歷年于茲亦既勞
矣荆楚雖遠而庶獄之治方漕為簡其克清心慎聽使
江漢之間無冤憇之民以答恩寵可

林積知福州

勅某長樂大蕃七閩之冠衣冠之盛甲于東南工商之
饒利盡山海然以地狹故民多不足俗巧故吏或不稱
爾既生於其鄉長習為政歷試諸郡服勞諸卿今予命
爾懷組而歸非獨觀榮於故鄉蓋將責實於來效可

朱服權發遣泉州

勅某爾昔嘗備左右史矣出蒞京口于今再朞朕比以
常法遷爾長樂而有司言爾事親不謹為吏不職朕方

以恕臨物不忍究也清源大府往為假守內飾孝弟之行外循律令之禁日夜不忘庶免來咎可

林頽知濠州

勅某汝奉使閩越不聞令譽而臨財弗慎以致煩言朕因其悔過待以寬憲而公議不置封章繼聞濠雖小邦有民與社服我恩貸勿忘省循可

令冕以率府率講書授通直郎

勅某先皇帝厚於宗室勉以為善有能通於經術率常

試以吏事爾誦習典謨明其義訓往服通籍之寵以為
維城之勸可

張宦古知登州

勑某文登濱海有邊防之責士出守其地非選不授爾
服勤南宮以積勞而往勉自修飭無忝明命可

高遵易改知全州

勑某黔南雖遠而任寄為重爾以親往憚於嶮艱改命
清湘以安祿養孝治之篤豈惟爾私可

何琬工部郎中

勅某昔漢宣帝信賞必罰綜核名實至於技巧工匠器械元成之間鮮復能及永惟熙寧元豐之政其微見於百工之事與漢宣比朕雖繼之以恭儉而至于練精之功其可忘之爾歷使諸道吏能有聞入贊冬官勵精庶務勉循舊章以毋失其故可

崔公度知潁州

勅某汝陰土沃民夥有魚稻之饒而訟訴之煩亦倍他

郡守得其人則湖山之勝足以為樂苟非其人犴獄煩
多日不遑給爾早以文詞備選更踐吏事亦云久矣勉
勤政事毋為賴俗所撓以稱朕命可

黃祐知賓州錢師孟知橫州

勅具官某等嶺南諸郡土曠民稀而密邇夷落以疆場
之政為重故守土之吏常選於右府以爾祐仕至通籍
而帥臣任以軍政以爾師孟雖為勇爵而習於文法之
治安城寧浦有民有兵其先為安靖以待外侮知予所

以命爾之意可

石景略可宣德郎

勑具官某朝廷因唐之故以六曹寺監綱紀百執事之治凡祖宗法令之舊合散出入有司有不能知者是以分命近臣條析為書於茲歷年爾與有勞焉功雖未究而考應于格舉自縣令寘之通階母郡邑之勞而被斯寵爾其勉之可

范純禮發運副使

勅具官某慶厯名臣莫如文正之賢者朕訪其後人寘
之於朝如見遺老以爾慎靖而文肅恪而通能世其家
是以擢於文昌之要付以禮樂之事而乃畏避權寵自
嫌閥閱東南漕事國用之根本任人之重朝廷難之均
通有無以實中都非特私請之便實亦當今之急也可

張汝賢右司郎中

勅某東南都漕出納財賦幾半天下左右都司綜執綱
紀與聞治要雖有內外之異而用人之慎其選維均爾

比自文昌出總饋運治辦之稱朕用嘉之還爾舊司益
勉毋怠以稱朕委寄之重可

韓宗道太府少卿朱光庭太常少卿

勅某等西漢之治以九卿為重隋唐以來政在中臺則
寺監之事蓋無幾矣然至于奉常司府禮樂財賦之所
在用人之慎初無聞焉宗道奮于世族之良練達政治
之要光庭比自諫諍之列出佐綱轄之司而皆敦朴自
守才力有聞擢居二寺之重益親歷試之效深自勉勵

以究成功可

李之純寶文閣直學士知成都府

勑蜀雖嶮遠而民習禮義易與為善難與為非一遇循良懷之沒齒少加虐政病不自申昔張詠出守方兵革之後撫之以義民欣戴之趙抃奉使方泰侈之餘節之以禮民安樂之及其復來吏民驩呼唯恐其去得失之效昭然著明具官某性本靖深政實寬厚處東南苗役之際簡以易從當西南征伐之衝安而弗擾遺澤猶在

父老知之是以改重職於西清付遺黎於右蜀勉因舊治追繼前人毋使張趙之賢獨專巴漢之譽可

廖正乙秘書省正字

勑某朕登延儁良策之翰林爾推言徃古以及當世挺然不回朕甚嘉之東觀圖書之府挾冊考義游於其間者皆士之選也爾往講習道藝長育才幹敦業以待舉吾於養士亦厚矣勉於問學思所以成之可

劉舜卿加遙郡團練馬軍都虞侯

勑朕臨御華夷不求功伐本欲屈已以安衆故務柔遠而息民蠹彼屬羌夙號逋寇誘陷思立得罪先朝置而不誅冀其改過乃敢結連西夏攻圍南川竊據邊城窺伺便利天奪其魄無復畏忌之心人嫉其奸致殄殲之勇時予良帥集此膚公具官某學通詩書才任斧鉞靜而知變勇且有謀至則避其銳鋒去則攻其不備臨洮堅壘破不崇朝講珠長橋殘於一炬元惡授首種羗震驚折馘執俘恩既均於諸將發蹕指示賞不可以逾

時宜錫州團之名仍遷軍候之職河湟遺種未忘反側之心帷幄深謀當審恩威之用勉思全勝以究前功可

游思雄改奉議郎陝西運判賜絳

勅某伐叛柔服朝廷之大義避實擊虛將帥之成筭爾出使西鄙灼知虜情能宣朝論之詳以助元戎之決縛致首惡壞其密謀諸羌震驚邊吏增氣遂以文史之舊與有干戈之功增秩易章未足為寵奉使將漕益觀厥成予欲戢兵固所望於爾者兵利乘隙豈可以為常哉

可

廖正古通判滄州

勅具官某景城負海帶河為一都會養兵備邊任兼將帥當得才士往為之佐爾昔為小官疾奸除惡以能名聞祇服寵命勉思所以為報可

龐元英鴻臚少卿

勅某朕嘉祖宗將相之臣有德于朝有勞于邊訪其後人長育成就以勸勵百辟矧爾風力強濟出入有聞贊

尊國容職高而事寡茲朕所以追寵先正之意爾往勉之可

張琬知秀州

勅某有司進退多士必以資考為之銓次爾入官雖久而法當為邑擢守嘉禾出於異恩其克臨民以寬勿為苛亟馭吏以嚴勿為姑息思所以答獎用之意可

曾孝序通判莫州

勅某河決而西北方並塞之地頻年水災民艱於食爾

以才選往貳守事其思所以均通有無疏導堙塞使吾
邊民免於流徙之患則吾爾嘉可

劉言可內殿崇班

勅某爾章獻外家子生於紈綺而能勉自飭勵以成淑
均之行選與宗姻既緣華族特增美秩茲有舊章益務
自修以永終譽可

張峋戶部員外郎改戶部郎中

勅具官某爾既出使近部入贊民曹其為屬任均矣然

猶以資考之異別中外之名用人之慎國有常典益勉
於事以觀成功可

韓緒等

西賊攻圍鎮戎軍南川寨等處緒等戰守有勞或復傷中韓緒韓進轉二官楊吉池

評趙說臧遜

各轉一官

勑韓緒等夏戎背恩侵我疆場犬羊之羣遍滿山谷諸將戮力清野以須或斬馘酋豪折其凶氣或堅完壁壘保我烝徒雖矢刃夷傷而忠節彌壯遂使醜類奪氣引兵遁還得不償費無以復令其下論功行賞國有舊章

酬其勞能增其爵秩朕既無德不報爾尚勉於立功可

蕃官党令征攬哥趙令京覃恩改官

勅某等朕嗣守不基凡在臣庶罔有内外咸欲先之以恩而後責其所報爾等守在蕃服世篤忠勤朕不以遠故遺爾增秩賜邑與朝臣比勉思自効以答恩寵可

顧臨再授給事中

勅朕歷觀多士惟有實者可以久用而不見其敗若夫無實之人朝為端良而莫入於邪具官某質重而文不

阿世俗比從將漕擢寘東臺封駁之風震竦朝聽旋以
河漳之害出使趙魏之衝而直聲在人公議所惜因其
入奏俾復舊司勿改平日之心審察未行之政朕有過
舉不憚改為苟無布於四方害及民物則朕為有知人
之哲爾亦有常德之譽矣可無勉哉可

孔文仲中書舍人

勅政令之出公卿為朕行之而臺諫為朕言之方其未
行內史舍人得聞其議與其既行而後言孰與未行而

議之哉具官某蚤以直言鋪陳治要流落雖久氣節不衰比自右史遷長諫列朕審聽其言未嘗吐剛茹柔慨然有仲山之節是以擢寘西掖試以代言夫文墨雍容既爾舊學論思密勿毋替前勞可

張頡待制河北都運

勅河決累年隄防未立西山諸水汙漫無歸屬此秋霖鞠為汙澤朕北顧之念寤寐不忘雖振廩已行而宿麥未廣欲使斯民無艱食流亡之患要在使者有愛人惻

恒之誠具官某蚤分刺舉之權旋委方州之重以勤勞
久次之選居出納右部之繁趙魏之憂宜任其責農桑
之政勉盡所宜特加延閣之華以重外臺之寄可

欒城集卷三十

欽定四庫全書叢要卷一萬五千二十六

集部

欒城集卷三十一

宋蘇轍撰

西掖告詞五十一首

太皇太后三代

曾祖瓊魏王

勅朕祗事東朝朝夕咨焉以從政乃者躬見上帝升侑
神考克以眇躬率行盛禮思所以仰報於慈訓謂莫如
追寵其先人太皇太后曾祖某蚤事章聖蔚為名臣智

勇冠時忠勤沒世決策澶淵之役卒致匈奴之和勲列
鼎彝慶鍾任姒賦政帷幄澤被海隅家傳異姓之王誓
堅帶礪恩加千里之國昭示子孫其尚有知服此休命
可

曾祖母李氏燕國

勅朕嗣守鴻圖初見上帝推行天澤不冒天涯矧惟文
母之家尊為外戚之冠恩自近始寵無與倫太皇太后
曾祖母某氏蘋藻之儀敬而不瀆珩璜之節動必以時

作嬪大家肇錫餘慶宜新湯沐之奉以追窀穸之榮音
徽永存尚克嘉此可

曾祖母李氏韓國

勑和熹之慶兆自高密外奮武功中篤淳行閨門之風
比隆儒者維我聖母鍾慶烈武積累之厚追配古人宜
其室家並受光寵太皇太后曾祖母某氏夙被女訓有
鵲巢之風能使君子成羔羊之行德配圖史福流子孫
肆予熙事之成宜錫大邦之寵服我新命賁爾舊阡可

祖繼隆楚王

勅朕惟祖宗功臣能父子相繼勲業不墜者惟曹氏高
氏克顯於世而皆篤生聖女輔成二宗之內治今予神
母實親庶政均覆内外是用寵其先人以慰慈心太皇
太后祖某武力自奮家聲益茂出擁旄節入董環衛與
漢辛氏武賢慶忌唐李氏西平大涼較長絜大固有慙
德茲予大享于合宮思與懿戚共享其福大邦名城爾
實宜之肇封荆楚以福爾後可

祖母康氏魯國

勅古之命婦貴從其夫維克有後則以其子矧予天下
之母內極三世之尊可無追崇助我孝治太皇太后祖
母某氏育德名族作嬪大邦象服之盛配德於山河形
管之嚴比潔於圭璧北列荆河之壤追賚九泉徙封少
昊之墟益彰異數追遠之厚予何吝焉可

祖母郭氏豫國

勅朕於舊勲之家無所不厚矧維坤德之重恩何以加

內殫孝敬之深心庶幾慈仁之一喜比緣大賚思極追
榮太皇太后祖母某氏保傳不勤宗族稱善姑章安其
能養子孫法之不忘茲用推惠澤於總章易隆名於大
國漏泉之慶尚克享之可

祖母全氏秦國

勅朕篤於奉天禮極嚴父思其志意莫如念母之深寵
其祖先尚有追封之典太皇太后祖母某氏婦德成於
早歲母儀著於當年宜其室家施及宗黨鴈鳩懷均一

之性翬翟見委蛇之容沒而不忘易舊封於西土傳之
罔極告新命於宗祧可

父遵甫唐王

勑高密之仁其報在訓汾陽之功其報在曖維其子孫
不能專有其福實生聖女以母天下漢唐之盛曠無與
倫太皇太后父遵甫魏王之孫而楚王之子也生而富
貴動由禮義才甚高而不試德雖隱而自彰命之不融
中道而殞祚我神母實代天工厚德載於三朝貴名高

於十亂仁民愛物每以生靈而為心克己復禮深惡外
家之太盛臨御期歲遂安四方和熹才有餘而德不充
懿安福至厚而功不著欲報之德不知所從茲予祀帝
於總章大需龐恩於海寓追崇之典所不敢忘改封堯
都增寵家廟可

母曹氏吳國

勅朕以四海之富為二宮之養猶朝夕歎然以為未足
推予此心以知聖母追遠之念罔有窮已謂將成就其

美莫如褒顯其先太皇太后母某氏生於功臣之家綽有女士之德恭儉廉退孝友慈祥實生太任作合英祖方其造舟以迎于渭教成而結其禍母育四方二紀于是君臨百辟期年有成推迹本源安可忘報改封南國以賚九泉庶乎有知服我新命可

母李氏秦漢國

勅尊之而欲其貴愛之而欲其富聖人非私其親也情之所厚禮有必然眷予外戚之小君蚤與唐國之內治

恩寵之異中外莫先太皇太后母某氏奕世簪裳生知
法度鵠巢無愧於居室麟趾自致于多賢愛均七子之
仁養及中宮之貴迨此臨軒之日方其授几之辰化被
族人貴震海內疏封二國蓋近世之罕聞壽考百年均
本朝之多福可

皇太后三代

曾祖敏中申王

勅昔我皇祖光宅天下求賢以自輔一時公相皆世之

豪傑子孫顯榮歷世不墜篤生淑女作配皇極究觀本
原蓋非一日之積也皇太后曾祖某光大篤實真漢相
之風富貴壽考有天人之福畫像原廟銘功太常方均
慶於合宮宜易封於成國服我休命祚爾後昆可

曾祖母梁氏魏國

勅朕親祀合宮仰以陟配昭考追文王之典俛以大賚
臣工侈上帝之福眷予母族之重實居戚里之崇豈無
異恩以廣慈念皇太后曾祖母某氏靜而守禮存江漢

之風動必有儀儼山河之象德洽宗黨慶流子孫疏封
有唐于今歷歲肇新畢萬之國以寵向氏之祧可

曾祖母張氏魯國

勑昔向氏之祖位列丞弼世方平寧在位正直有羔羊
之風退食委蛇本鵲巢之致積是懿德逮其曾孫嬪于
有虞遂母天下寵光所被中外莫加皇太后曾祖母某
氏躬服孝慈動由禮義其歸以百兩之衆其貴有六珈
之儀壽雖止于中身慶實鍾於來裔推予享帝之賚錫

以保魯之封尚克有知服此休命可

曾祖母宋氏楚國

勅朕躬享昊天升侑神考外推嚴父之教內懷將母之誠厚撫其家追王厥祖下迨閨幃之懿咸加封爵之崇躬孝率民朕無所愧皇太后曾祖母某氏嚴於正家動必由禮采蘩以共公侯之事親桑以致袞冕之華藹然令猷克光來葉肇新封於荆楚告休命於烝嘗尚克有知膺此異數可

曾祖母王氏陳國

勑朕尊尊以教敬親親以教愛非予戚里之舊孰能兼受斯禮皇太后曾祖母某氏毓德柔嘉執禮嚴靖服膺保傳之教究知臣妾之勤內無怨言家有餘慶循致坤元之福遂正母儀之尊方誌祀於總章既大賚於寰海易爾句踐之國錫以太昊之墟恩寵有加永世無墜可

祖傳亮榮王

勅爵為上公周制也王以異姓漢法也朕兼采周漢之

舊以寵親賢之家因大享之告成錫異恩而追遠皇太
后祖某故相之子生而顯榮躬蹈儒者之風行無世祿
之過積累之厚下迨子孫褒寵之優肇建邦邑因其奄
受北國之命寵以劖立南面之尊朕將以慰母心爾亦
世享廟祀可

祖母吳氏越國

勅申王諸子皆列貴仕榮國不耀中止郎官潛德之深
其報在後及孫而顯母儀天下德澤流行室家光榮皇

太后祖母某氏珪璋之行著於族人蘋藻之恭宜于祖

考貴始封邑恩錫有邦茲因總章之祀推廣隆祐之孝

裂會稽之奧壤增湯沐之舊封尚克有知服我休命可

父經周王

勑申伯之德參於周召之間褚公之賢載於王謝之列
恩非專於戚里名自顯于搢紳今予外家庶幾前烈皇
太后父某緒出世胄交友儒林休聲藹然多福自至卧
淮陽之近輔表東海之雄藩清淨不煩得承流之要忠

悃深至有入告之常壽止中身慶在隆祐茲因嚴父之
祭起予念母之心大啟周南之封以慰宮中之孝國有
常典匪予所私可

母李氏豫國

勑先皇帝刑于室家以御于天下非獨外有輔佐而中
宮之懿實與有勞煥乎四德之克豈惟一世之積皇太
后母某氏敦閨圖史服勞組紩肅雍婉如之間祇敬姑
章之奉誕生淑女之淵穆不及君子之榮華初建長秋

閔追榮之已遠繼開隆祐知餘慶之方遐乃者熙事告成龐恩廣被肇錫荆河之國以新脂澤之田賁于九原嘉此休命可

母張氏冀國

勑朕聞後庭以德進則外戚以福終周之任姒既克保其國而漢之薄寶亦能全其家至哉坤元實相內治宜爾外家之慶仰同帝室之休皇太后母某氏性稟淑均德推靖慎因豫國治家之遺迹迨慈徽毓德於妙年命

之不融乃止中壽比緣恭祀啟湯沐於堯都錫以命書
賁蒸嘗於家廟漏泉之澤奕世不忘可

皇伯世儔贈奉國軍節度觀察留後追封奉化砲
公

勅唐之藩郡以留後為重周之列國以諸公為貴國朝
兼用古制外以待將帥之功內以優宗室之懿非此二
者未嘗授焉具官其貴而能降富而不盈孝弟之美著
於親黨儼恪之容見於朝會沒身不試遺範不忘寵加

兩使之貳優以五等之貴魂而有知嘉此休命可

越國賢惠長公主追封大長公主

勅王姬之貴而能執婦道以成肅雍之美朕嘗聞召南唐棣之詩矣永惟皇祖之慶篤生淑女之賢賦命不融中道而沒哀榮之典茲何敢忘故越國賢惠長公主襲寵宮庭生知禮義儀降王后有車服之崇德配君子稱室家之懿逮茲享帝之澤推予尊祖之誠大長之稱寵榮斯極追錫成命以賁九泉可

世繁贈安武軍留後追封信都郡公

勑留後之權均於元帥郡公之爵貴於諸侯國朝兼采周唐之舊官以為親賢之異數慎終追遠斯極哀榮具官某生於富貴之中綽有縉紳之度行已以禮好善不衰朕篤於合族之仁嘉爾終身之善錫之好爵胙以大邦仰增族黨之華俯為窀穸之耀可

唐俛蓬溪簿於瀘州隨軍部夫
入界瘴死贈梓州錄參

勑具官某乃者師征瀘戎爾與在行瘴癘為虐往而不

返朝廷追錄勤勞不遺細大特加督郵之贈以易貳布
之禮孝子之請予何忍違可

克賢贈奉國軍兩使留後封奉化郡公

勑生於富貴而成於禮義克自抑畏以沒其身不有寵
榮何以為勸具官某宗黨稱孝朝廷所賢肅雍右衛之
華捍禦遙州之重賦命不淑中道云亡匍匐之恩情何
極已哀榮之典國有故常可

士覲贈左領軍衛將軍

勅具官某宗室之良生而不試沒而無述則為善者何
勸焉爾以孝弟忠信紀於族黨贈之諸衛之秩以表平
生之賢竒而有知嘉此休命可

安燾三代妻

曾祖

勅朕方恭默思道垂拱責成乃者大享合宮陟配聖考
躬執珪幣敬逆神休奉璋峩峩皆先朝之舊降福簡簡
告純嘏之豐朕弗敢專用廣其施具官某曾祖某懷抱

美志浮沉人間孝弟篤於父兄忠信驗於朋友天道不
諂報在子孫人爵自高寵極師保朕命不替世世賴之
可

曾祖母

勅朕嚴父配天以教天下之孝肆眚及物以廣上帝之
仁顧予左右丞弼之良咸有肅雖顯相之助既寵榮其
祖禰復追賚其室家具官某曾祖母某氏蘋蘩之儀敬
而不瀆珩璜之節動必以時休聲藹然後世追誦宜錫

召公之社以寵安氏之祧尚克有知服我休命可

祖

勑天之於人無德不報凡今卿士大夫有立於朝尊寵
於世者皆其先人積累之厚茲朕既奉神考以配上帝
尊親之極誠禮兼盡思與羣公推廣斯義以致其孝具
官某祖某才甚長而不試德久晦而自彰身雖屈於當年
善終表於來世三師極品焜耀縉紳之間九原有知寵
綏存歿之地可

祖母李氏

勑古之命婦貴從其夫惟克有後乃以其子矧予本兵
之地實總幾事之煩乃者大享合宮相予肆祀義無不
答禮有追崇具官某祖母某氏性本柔嘉行稱純絜婦
德成於雍穆母儀備於慈仁胙以少昊之墟易其叔鐸
之土服我休命宜爾後人可

祖母齊氏

勑古之命婦貴從其夫惟克有後乃以其子矧予本兵

之地實總幾事之煩乃者大享合宮相予肆祀義無不
答禮有追崇具官某祖母齊氏恭順以惠女師慈儉以
奉君子閨門從而有禮子孫賴以多賢上蔡之封歷年
於是大名之壤開國惟新寵以密章賁爾家廟可

父

勑士之脩身行義不顯於國必顯於鄉黨故其乘時得
志不在其身必在其子孫謂天難忱於事可考具官某
父某樂於潛晦不求聞知推良心以與人抱長才而不

試安輿就養遍歷於方州西府宴閒薦移於歲月錫之
好爵以裕予心服我寵章益介眉壽可

母張氏

勑士大夫義隆于顯親恩深于念母追劬勞之罔極悼
寵祿之無施茲予愍祀於總章大霈龐恩於海縣思廣
吾孝以即爾心具官某母張氏靖而有禮勤於治家空
傳四德之名不待千鍾之養寵加異數以慰終天爵無
異于生榮地莫加於韓樂服我休命子孫不忘可

母王氏

勑朕初見上帝嚴配文考公卿駿奔來相熙事工祝致
以盡人子之願者方今一人而已總章之慶恩被遐遠
封爵之厚予何愛焉具官某母王氏居不忘敬行必由
禮手治蘋藻躬執組紃老而不衰足以爲法宜錫三秦
之壤以爲一族之華壽考且寧祗服朕命可

妻

告均錫純休朕不敢專思以迨下非獨身享其報亦使
家被其榮具官某妻某氏少長名家輔佐吉士蒸嘗之
敬先祖是安膳服之宜宗族咸喜仁厚見於麟趾正直
發於羔羊宜增湯沐之封益耀笄珈之寵服我新命宜
爾家人可

李清臣三代妻

曾祖

勅朕方恭默思道垂拱責成乃者大享合宮陟配聖考

躬執珪幣敬逆神休奉璋峩峩皆先朝之舊降福簡簡
告純嘏之豐朕弗敢專用廣其施具官某曾祖某迹晦
鄉黨德如珪璋力行於方寸之間責報於百年之後子
子孫之盛縉紳罕聞保傳之尊德義為允服我休命宜
爾後昆可

曾祖母尹氏

勑朕嚴父配天以教天下之孝肆眚及物以廣上帝之
仁顧予左右丞弼之良咸有肅雖顯相之助既寵榮其

祖禰復追賚其室家具官某曾祖母某氏及其良人咸有淳行孝敬稱於宗族福祿迨其子孫策名雋科與我近輔肇啟伯禽之邑以為家廟之華其尚有知服寵無數可

曾祖母周氏

勅朕嚴父配天以教天下之孝肆眚及物以廣上帝之仁顧予左右丞弼之良咸有肅雖顯相之助既寵榮其祖禰復追賚其室家具官某曾祖母周氏珪璋之行著

於族人蘋藻之恭竭于嘗禘貴始封邑恩錫有邦肇從
申伯之封改食潞子之國服我休命以賁宗祧可

祖父

勑天之於人無德不報凡今卿士大夫有立於朝尊寵
於世者皆其先人積累之厚茲朕既奉神考以配上帝
尊親之極誠禮兼盡思與羣公推廣斯義以致其孝具
官某祖某修身正家而聲被于鄉黨居約履順而福流
於子孫世有英才與聞大政寵列三師之貴祚隆十世

之餘錫之閔章以貲幽隧可

祖母

勅古之命婦貴從其夫惟克有後乃以其子矧余中臺
之輶實總萬機之煩乃者大享合宮相予肆祀義無不
答禮有追崇具官某祖母某氏服勞組紃敦閨圖史祇
敬姑章之奉肅雍娣姒之歡中饋之儀風猷未替東國
之贈寵數有加賜之密章賁爾廟祏可

父

勑士之脩身行義不顯於國必顯於鄉黨故其乘時得
志不在其身必在其子孫謂天難忱於事可攷具官某
父某隱而不試久乃自彰孝弟隆於父兄忠信驗於朋
友是亦為政人無間言由其教子之嚴為我得臣之助
比推恩於秋享增峻秩於師垣追貴九原尚克嘉此可

母

勑士大夫義隆於顯親恩深於念母追劬勞之罔極悼
寵祿之無施茲予愍祀于總章大霈龐恩於海縣思廣

吾孝以慰爾心具官某母某氏山河之容江漢其行夙
被女訓有鵠巢之風能使君子成羔羊之德宜即鄉邦
之奧壤以為封國之美名服我寵章祚爾後嗣可

妻

勅朕登用雋傑委任責成非獨厚以爵秩之華亦將盡
其室家之願乃者躬祀帝考大賚臣工封國迨於閨闥
世祿通於子弟朕於卿士實無愛焉具官某妻某氏生
於名儒之家綽有女士之德愛均諸子比鴻鳩之仁貴

以良人備翬翟之服肇錫山河之廣寵增湯沐之封宜
其家人服我休命可

范純仁三代

曾祖

勅朕方恭默思道垂拱責成乃者大享合宮陟配聖考
躬執珪幣敬逆神休奉璋峩峩皆先朝之舊降福簡簡
告純嘏之豐朕弗敢專用廣其施具官某曾祖某潛德
不耀餘慶自彰仁義之報不及其身功名之實灼見於

後極三師之貴既錫於寵名慰九原之知肇建於成國可

曾祖母

勅朕嚴父配天以教天下之孝肆肯及物以廣上帝之仁顧予左右丞弼之良咸有肅雖顯相之助既寵榮其祖禰復追賚其室家具官某曾祖母某氏幽閑之中率禮不越共儉之素御家有常報在子孫世篤功烈肇錫韓侯之邑以為家廟之華其尚有知服寵無斁可

祖

勅天之於人無德不報凡今卿士大夫有立於朝尊寵
於世者皆其先人積累之厚茲朕既奉神考以配上帝
尊親之極誠禮兼盡思與羣公推廣斯義以致其孝具
官某祖某種德之深稼而不穡發源之遠流則愈長偉
哉元子之賢繼以諸孫之盛廟食之久蓋未可量鄉國
之封肇新其舊可

祖母

勑古之命婦貴從其夫惟克有後乃以其子矧予本兵
之要實總幾事之煩乃者大享合宮相予肆祀義無不
答禮有追崇具官某祖母某氏徽柔靖恭信順慈孝天
道不詔報在後昆人爵自高祚以封國易宛丘之故地
錫全楚之大邦尚克有知服我新命可

祖母

勑古之命婦貴從其夫惟克有後乃以其子矧余本兵
之要實總幾事之煩乃者大享合宮相予肆祀義無不

答禮有追崇具官某祖母某氏服勞組紲敬治彌藻祇
率祖考之舊循致子孫之賢中饋之儀風猷未替西國
之贈寵數有加賜之密章以嚴廟祀可

父

勅昔我皇祖仁宗博求多士以綏靖四方天惟眷佑賚
之正人既以克和羨戎又以燉治區夏出入中外實兼
文武之烈今予嗣守不業選任大吏亦拔西帥以臨中
樞匪伊異人惟父惟子得人之盛朕無愧焉具官某父

某秉德不貳好謀而成始任諫諍知無不言中為將帥
靖而能勇卒以功業股肱先聖茲予懷想風烈用建爾
仲子嘉其繙衣之德錫以召祖之命惟師保之貴既無
以加故河漳之封益大其寵可

母

勑士大夫義隆於顯親恩深於念母追劬勞之罔極悼
寵祿之無施茲予毖祀於總章大霈龐恩於海縣思廣
吾孝以慰爾心具官某母某氏山河之容江漢其行其

君子正直有羔羊之德其後世信厚有麟趾之風宜錫
寵榮以慰存歿乃祖唐相實啟衛國之封眷予樞臣願
為密章之贈貴于幽壤尚克嘉之可

中丞劉執父

勑朕臨照百官寄耳目於中執法乃者季秋大享駿奔
在廷迄于熙事之成繫其正色之助方均行於惠澤宜
特先於庶工具官某父某種德之深終身不顯教忠之
篤沒世乃彰挺然司直之良美哉有子之慶不有錫命

孰知其賢宜加四品之崇以為九原之慰可

欒城集卷三十一

謹案卷三十一第八頁後七行緒出世胄刊本緒

訛絕據別本改

第十五頁後二行蒸嘗之敬刊本蒸訛承據別本

改





總校官庶吉士臣張能照
校對官中書臣張 壞

謄錄監生臣周嘉猷

欽定四庫全書叢要

集部

樂城集卷三十二

詳校官助教臣常循



欽定四庫全書叢要卷一萬五千二十七

集部

欒城集卷三十二

宋蘇轍撰

西掖告詞四十九首

苗貴妃三代

曾祖

勑昔我仁祖刑于室家以御于邦國下迨嬪御化其德
風罔不賢淑迄茲三世猶有耆舊儀于六宮故其祖考
日益尊顯貴妃苗氏曾祖祚潛德不耀久而後彰至于

曾孫寵託宮掖茲因大享祇率舊章命為上公封以成國九原有知尚克嘉此可

曾祖母

憲天之報施昭然不誣世之顯榮皆有由始而况迨事
皇祖流澤私親夫豈偶然而至於是貴妃苗氏曾祖母
馮氏柔嘉之德見紀于族人慈儉之風有聞于後世乃
眷曾孫之貴親承大享之休易湯沐之舊封為窀穸之
新寵服我成命世世不忘可

祖

勅朕嗣守鴻圖初見上帝推行天澤不冒海隅矧惟先朝舊人外家通貴恩自近始宜無與先貴妃苗氏祖仁恭隱約之中操修以禮被寵光於來裔知報施之不誣官為上公已極人臣之貴地分全楚復推列國之雄錫是閔章以責幽壤可

祖母

勅朝廷寵綏臣庶褒顯其先惟有四輔之崇乃錫三世

之命其於禁掖殆無幾人貴妃苗氏祖母袁氏容德之修著於宗黨福祿之盛及其子孫方予熙事之終祚以成國之賦貲爾廟祀世世保之可

父

勑於赫皇祖仁覆四方永懷弓劍之遙不忘簪履之舊而况逮事左右今為老成宜其尊親特被休寵貴妃苗氏父某躬有懿行篤生淑人既壽且康允仁而信薦經元祀之慶每極追崇之榮肇錫大名以配隆爵密章之

賜澤及九泉可

母

勑故舊不遺則民不偷矧吾三朝之人獨享百年之福
眷爾近戚予何可忘貴妃苗氏母裴氏徽柔靖恭幽閑
肅敬行應家人之美慶鍾女子之祥茲予大享之成肇
易新封之寵漏泉之澤存沒兼榮可

文臣升朝封父母妻

父

勅具官某父某朕愍祀總章陟配神考子大夫犇走厥服咸與有勞推予嚴父之心為爾顯親之慶錫命之寵壽考不忘可

母

勅具官某母某氏慈惠有以宜家肅敬可以教子乃者大享之禮百執咸事朕寵綏忠孝之心推本源流之自疏爾爵邑以榮子孫可

妻

勅具官某妻某氏士大夫出仕于朝能以恭儉正直成
羔羊之美必有淑女以治其私用能退食委蛇無內顧
之慮朕方推帝澤於天下其何愛一邑不以寵其家人
可

文臣升朝追封父母妻

父

勅具官某父某合官之享義存嚴父朕惟天下之士
追養之誠上下無間是用推予錫命之寵旌爾教忠之

勤九原有知尚服休命可

母

勑具官某母某氏生能正家沒有良子欲盡劬勞之報
莫如爵命之隆方大賚於總章宜肇新其湯沐服我休
命世世不忘可

妻

勑具官某妻某氏恭事君子宜其家人勤勞則同而寵
榮莫及存沒之念終身惻焉方予慶賜之行肇加脂澤

之奉貴于寃空尚克嘉之可

范鎮父

勑士有歷事三世秉持一心志懷金石之堅言為社稷
之計耄期不亂清靜無求訪之古人殆亦無幾朕既復
命以位思見其人旋觀德業之崇知有源流之自具官
某父某隱居閭巷名出搢紳以孝弟為傳家之資以詩
書為教子之實自修於方寸之內責報於百年之間子
孫勃興冠冕相繼方予大享之慶錫以追崇之榮開府

之儀比隆於三事漏泉之澤少慰於終天可

鮮于侁父母

父

勅朕既得直諒多聞之士而寘之禮樂之司擢之諫諍之列矣乃者總章大享來相于庭因予嚴父之心成爾顯親之願具官某父某懷抱美志博通古文上自河圖洛書下及天文地理無有不綜庶幾古人卷懷而歸以遺後嗣金章紫綬雖不及其平生密印閔書示追榮於

泉壤可

母

勑婦人之賢室家所賴上能使其君子有羔羊正直之行下能使其後世有麟趾信厚之風詩人所嘉於今猶信朕既得其子以知其親具官某母趙氏江漢之行山河其容手執詩書親教子弟雖負米而養自有孝弟之歡而列鼎以祠莫盡劬勞之報宜易脂田之奉仍加祿翟之榮追賚九原以慰存沒可

陳曼父閔

曼任登州錄事父閔年九十一以敕封承務郎

勅具官某父某總章之慶凡通籍之士皆獲爵命其親朕惟子大夫沈於下僚家有耄期之養而寵榮不及念之惻焉錫爾一命以綏子孫之志可

錢勰父母

父

勅錢氏舉國內附俾吳越之人免兵革之亂子孫受封帶河礪山藏在盟府矧其後世賢傑間出赫奕相望其

於追崇安可復後具官某父某貫穿文史練達典章博辯
有文絕出倫輩父子兄弟進以直言譽喧一時望以卿
相中道而殯報在後昆儼然侍從之華與我總章之祀
寵之開府載是閔書九原有知服命無斁可

母

勅婦人之貴當從其夫禮變古今義均存沒肆予大享
之慶俾極追封之榮具官某母某氏育德高門作嬪大
族生知圖史之樂不煩保傳之箴餘慶在其子孫清風

播於宗黨肇封成國光有翟衣錫此密章寵爾廟祏可

李璋三代

曾祖

勑昔我仁祖敦睦九族以和萬邦顧惟念母之深特厚
外家之禮往事雖遠此恩未移具官李璋曾祖某懷抱
美志浮沉人間孝弟篤于父兄忠信驗于朋友天道不
諂報在于孫人爵自高寵極師保肆予大享之慶肇易
三秦之封九泉有知服我休命可

祖

勑成王之母邑姜齊侯世受其祉宣王之母申后申伯亦賴其寵矧我皇祖之聖重以李氏之賢子孫相承冠冕日盛追崇之典國有舊章具官李璋祖某隱約之中操修以禮克有淑女篤生聖人寵雖不逮於平生澤尚可加于來裔比因秋享肇易國封錫是閔書以寵廟祀

可

父

勑朕深惟仁祖之意寵綏元舅之家中錫婚姻以固恩
禮乃眷奠邦之嗣來相合宮之祠熙事告成鴻恩先及
具官李璋父某貴而能降富而不驕諸子之賢迭為將
帥大邦之寵更王齊秦肇新錫命之書以慰終天之感
可

王堅父

勅朕惟景德祥符之間治定功成庶幾三代時惟丞相
魏公左右厥辟同底于道於穆清廟卒配蒸享至于慶

歷嘉祐之際克有賢子不墜厥家出入中外允文允武
茲予季秋大享追念先正之後有能在朝相我熙事宜
有褒寵以勸百官具官某父某始以諫諍名聞朝廷終
以將帥威加戎狄父錫之慶子成厥功故雖富貴顯融
赫奕再世而天下之議不以為過生為六官之長沒加
三事之榮匪予爾私惟德之報可

曾布父

勑曾氏系出東魯淵源師友本於孔氏譜牒詳具雖遠

而明子孫盛大繼顯於世具官某父某文學之美肖其先人議論之長信於來世仕而不遇志存於書沒而愈彰慶鍾厥子屬詞比事粲然有古人之風理財禦邊卓然有當世之具才智競爽爵秩同升其於搢紳殆無一二朕既任以事恩寵其先今茲大享告成顯親沛澤追錫崇階之贈以慰九原之知可

蔡確父母

父

勅位極三師而爵封大國雖元勲盛德有不能至者矣
而將相大臣欲顯其親者得之吾是以知積善之為難
而有子之為貴也具官某父某潛於下僚不求聞達躬
有懿行久乃發揚美哉中子之賢任予元宰之事久厭
機務退守便蕃深念教忠之勞求易苴茅之賜大名奧
壤雖為甸服之雄全楚新邦願即故鄉之近九原未泯
尚克嘉之可

母

勑貴以其子而爵從其夫此婦人之禮也時予舊相之寵告我念母之誠亦何愛於大邦不以成其純孝具官某母某氏仁以逮下嚴於治家禮先中饋之勤恩遍外姻之廣命之不淑沒有餘哀肇易脂田之封永保荆人之國寵爾廟室以利後人可

秦晉國安仁保祐夫人張氏祖祖母父母

祖

勅具官某祖某朕追懷弓劍之遙不遺簪履之舊矧功

存於保護而寵極於平生宜因大享之恩成其尊祖之
念寵加列衛追賁九泉可

祖母

勑具官某祖母某氏朕祇祀合宮嚴配聖考思其志意
恍焉如存是以推廣舊恩施及幽遠肇易脂田之奉以
申追遠之誠可

父

勑具官某父某朕孝愛之深無德不報永惟保育之舊

夙著劬勞之恩方大享之告成宜顯親之施及諸衛之
貴存沒兼榮可

母

勑具官某母某氏爾蚤以息女之良功存蕃邸之養報
已隆於貴顯恩宜逮于存亡肇新湯沐之封以為幽冥
之慰可

世采母李氏安康郡太君世智母何氏永昌郡太

君

勑嚴父配天國之大禮也以子貴母三代之舊章也茲
予大賚之慶澤被含生之倫矧於近親志切追遠錫命
之典其何可忘具官某母某氏承上克恭臨下以禮生
著御家之法歿聞有子之賢賜湯沐于大邦為窀穸之
餘寵九原未泯尚克嘉之可

張方平父

勑士之懷抱志節老於山林不求聞知者何可勝數永
惟公卿之貴本由父祖之賢行義絕倫聲聞不著特緣

有子得列於朝追想風猷不忘嘉歎具官某父某性本
靜重行極高明宴坐一室之間心遊萬物之表澹然自
守寡笑與言遂以絕人之姿深積傳家之慶柱石之寄
嘗參二府之崇几杖之儀又已十年之久比緣昭配許
以侍祠宜因均福之恩懋錫追崇之典地分全魏爵列
上公九原有知服我休命可

李端愿父母

父

勑富而好禮貴而不驕勢憑戚里之榮躬被儒者之節
昔聞其語未見其人具官某父某爵本傳家親聯築館
進退以禮無世祿之非交友多賢盡當時之傑被遇前
聖流芳後來有子而賢久列東宮之貴開府以贈仍因
西土之封錫是閔章實爾幽隧可

母

勅帝乙歸妹而交泰之功著王姬之車而肅雖之禮成
風化所由恩禮當異具官某母某氏淵源之盛當世莫

倫禮義之隆至今傳誦儼若姑章之奉穆然閨壺之風
車服下于王后而不以驕人子孫衆如螽斯而要於守
法故能奕世不墜休聲愈隆茲予大享之成因爾故封
之廣閔書密印寵數不渝可

張方平祖

勅朝廷優二府之臣列三世之贈眷我耆舊退處鄉閭
方大享之告成宜申錫于休命賁及祖廟進封大邦具
官某祖某修身正家而聲被於宗黨居約履順而福流

於子孫力行於方寸之間得報於百年之後朝之大老
惟爾元孫肇新淇奧之封增寵師臣之貌告于幽隧服
此優恩可

富紹庭母

勅朕追懷先正之臣建功當年流澤後世時惟丞相臨
淄公以甘盤之舊股肱太平丞相韓公以魏丙之賢翼
亮數世風流未遠家事落然比因大享之成重興追遠
之念具官某母某氏臨淄公之子而韓公之配也幼服

圖史之訓晚同忠義之勤有德有年五福兼備奄從淪
謝中外咨嗟茲用不忘舊勲寵加新命因其封國之故
以明有子之良賁爾宗祧世世無斁可

蔡朦父挺贈開府儀同三司

勅昔我皇考分命守將鎮撫四夷時惟西羌弗克靖順
實賴良帥是震是服遂以顯績進登西樞命之不融中
道而殞聲績之美于今不忘具官某父某謀猷靖深勲
業崇茂治邊之略紀于一時經遠之功著于來世比緣

陟配之享永懷先正之良追錫崇階比儀三事有子之慶奕世嘉之可

劉攽母

勑婦人之賢著于麟趾贈禮之盛極於翬衣朕親享合宮加惠百辟矧復從官之列來告念母之誠可無異恩以示追遠具官某母某氏篤生大族作配名儒環珮之聲動必由禮蘋藻之薦舉不失時追懷令猷尚有諸子守道不倚則漢中壘尉博學不倦則唐居巢侯美哉有

子之良為我得臣之助祚之大器慰爾九原可

奉議郎任斯年祖母黃氏

以母封回授永壽君

勑朕親享合宮均慶多士以寵榮其親推而上之又及其祖其於親親尊祖之義備矣美名大邑介爾眉壽子孫不忘益勉忠孝可

張琬父昇追封韓公

勅朕追懷祖宗下逮先正聞嘉祐治平之盛宗臣大老相望於朝永思其人如見風采具官某父某始以直氣

振於中司終以令德長於西府歷事二祖懇款一節歸
老嵩少追跡松喬殂謝未幾風烈猶在比緣合宮之祀
嘉其有子之慶即封鄉國以賁私祧九原有知服此休
命可

安燾知樞密院贈三代

曾祖

勑樞臣之長戎政出焉內則張皇六師以禦外侮外則
綏懷四夷以安中國久虛之位歷試以庸特推三世之

恩以示百官之勸具官安燾曾祖某處躬甚厚與世無求人莫能知而天相其善身隱不仕而世承其休逮爾曾孫之良冠予西府之列折衝之效偃革可期斯用錫帝傳之隆名貢私祧之常祀九原未泯百世不忘可

祖

勑古之賢君有師臣之義朕臨御百辟想見其人眷予宥密之賢夙承祖考之烈積德之厚獲報甚隆寵之上公以見予意具官某祖某賦性端慤終身退藏孝弟發

于自然忠信驗于來世松生於谷閑歲不衰泉發於山
造平而大啟良心於嗣子祚多福於元孫歸乎家廟之
隆數致閔書之賜貴于幽隧宜爾後昆可

父

勑子之能仕父教之忠率循孝弟之風施及邦家之廣
朕既用其子不忘其親薦錫崇階之榮以寵退食之養
具官某父某資性淳篤既慎靖以安貧操行堅強亦共
儉以居富一變簪裳之盛親見廊廟之崇循致承平既

股肱之允賴報之寵祿宜命數之超升壽考且寧訓敕
無怠可

王汝舟祖母胡氏封嘉興縣太君

汝舟乞以妻
叙封回受

勑某合宮之慶士得以其親及其室家之封封其大父
母今汝舟願以妻之叙而加其祖母恩從其厚將以極
尊祖貴老之義而已綏爾眉壽服寵無斁可

皇兄令擢等所生母贈縣太君

勑某母某氏合宮之慶澤被存沒爾篤生令人當以子

貴肇錫湯沐之奉以慰怵惕之感竊而有知嘉此休命
可

富弼贈太師

勑慶厯之盛朝多偉人維范與富才業名位實相後先
海內稱誦見於聲詩比之夔契經涉險阻繼以存亡惟
天所佑克享全福厯相三世配食清廟肆予大享加寵
先正亦克有子列于在廷具官某父某德及夷夏功載
史冊出盟獫鬻復結二國之歡入秉陶鈞首開萬世之

議性本直諒終身不回心樂虛閒超世自得音容未遠
風烈可追錫以上公之章明我師臣之意告于幽隧慰
爾後昆可

劉沆追封秦國公

勑生而秉鈞顯名於世沒而有子通籍于朝家存舊德
之餘國有世臣之盛比緣大享之慶來告顯親之誠勲
舊既隆恩寵亦異具官某父某奮身南國致位中台風
蹟之優效見於民政勤勞之久聲載於圖書頃自告終

奄更三世爵極師保之重國分吳會之雄宜錫社於秦
亭示追崇於家廟九原未泯服此鴻恩可

盧政贈司空

勑祖宗懷柔四方兵革不試雖有貔虎之士擁旄鉞之
寄皆老死侍衛之間不見才武之効然其聲績未泯子
孫在廷追遠之恩國有常典具官某父某弓劍之任推
雄萬夫韜略之賢著稱當世卒能保寵以沒其身茲大
享於合宮示追崇於列辟宜錫冬官之印以增家廟之

榮竟而有知服寵無斁可

王存妻胡氏齊安郡夫人

勅朕數求哲人咨以大政知其有孝恭祖考之義則爵
其三世以禮其私祧知其有慈愛室家之心則封之大
郡以助其內治凡所以深慰其情而優為之禮者亦已
至矣具官某妻某氏舉無失中言必由禮起於糟糠而
善處窮約逮其富貴而不聞驕奢茲使君子綽有成德
遂登丞轄之位率由夙夜之佐是用望郡以為湯沐翟

弗以與會朝勉修令猷答此休命可

楊王第三女封安定郡主

勅朕有懷二宗思見文武之盛念我叔父亦配間平之
賢粵惟禮命之優蓋有朝廷之舊女既及笄而字爵當
裂土而封恩禮之隆孝敬斯在楊王第三女幼而好禮
姆教不煩長而知方婦德已備茲擇良士亦惟外親將
修纁雁之儀肇錫湯沐之奉惟恭且儉可以保是美名
惟孝與和可以安于二姓風化之首其尚勉之可

金匱要略全註

卷三十二